



Selasa, 13 Juni 2023

2 Timotius 1:3-5



Ingeten Si Mehuli



I bas sada keluarga, lit perbapan si enggo metua si igelari kita rusur nini bulang. Enggo enterem kempuna sabap anak si ipupusna pe enterm. Nini bulang enda kalak si pembersih, uisna icucina alu sabun batangen. La ipediatna kalak si deban nuci uisna. Ia cukup disiplin makeken waktu, benaken medak erpagi-pagi mis ia ertoto, sarapen pagi, erdahin ku juma, makan siang, bahanna ka jam tunduhna siang, e maka ku kede ia ngenen informasi bas kuta seh brngi kenca man ibahanna perjumpaan ras kempuna, iajarina kerna pengalamen geluh e maka radu ras ia rende ras ertoto. Lagu si rusur ke endekenna KEE 80, Jesus nggeluh ni tendinggku. Kenca nini bulang enda ngadap man Tuhan, lit si rusur jadi ingeten kempu kempuna e me disiplin buang enda ras lagu si isenangina. Asal pulung kempu e kerina iendekenna lagu si isenangi nini bulangna. Arah kegeluhen nini bulang enda lit ingeten si mehuli man anak ras kempu-kempuna.

Ingeten si mehuli, jadi temanta wari enda. I ja Paulus ngidah ras nginget uga perbahanen nini ras nande Timotius i bas numpak-numpak ras mpebelin-belin Timotius kitik kitikna nari. La lupa nini ras nandena nuanken kiniteken man Timotius, seh maka Timotius erkiniteken paguh man Tuhan Jesus. Kinitekenna e teridah arah kepatuhenna ngikutken pengajaren Paulus, tutus atena erlajar janah iikutkenna Paulus i bas nehken erberita si meriah. Pengajaren nini ras nande Timotius e jadi ingeten si mehuli, si erguna pe ku bas kegeluhen Timotius.

Adi si gargari ras si inget-inget, pengalamen siapai nge pagi si jadi inget-ingetenna di kune kita lanai ras ia nggeluh i doni enda? Kai nge pagi si jadi tading-tadingennta man anak-anakta e? Perlu si bahan waktu ertoto ras ngoge Pustaka radu ras anakta.

Warisan terbesar yang bisa kita tinggalkan untuk anak-anak kita adalah kenangan indah (Og Mandino)